

18 MAY 2001

DR MAHATHIR TIBA DI MUAR UNTUK LAWATAN DUA HARI KE JOHOR

MUAR, 18 Mei (Bernama) -- Perdana Menteri Datuk Seri Dr Mahathir Mohamad dan isteri Datin Seri Dr Siti Hasmah Mohd Ali tiba di padang Sekolah Kebangsaan Sri Tangkak, Muar di sini dengan helikopter pada kira-kira pukul 10 pagi untuk lawatan dua hari ke Johor.

Perdana Menteri turut diiringi oleh Menteri Penerangan Tan Sri Khalil Yaakob yang juga Setiausaha Agung Umno.

Menteri Besar Datuk Abdul Ghani Othman, Exco-exco Kerajaan Negeri dan ketua-ketua jabatan menyambut ketibaan Perdana Menteri di padang sekolah itu.

Sejurus tiba, Dr Mahathir akan menghadiri perjumpaan tertutup bersama pemimpin Umno Bahagian Segamat dan Bakri sebelum menunaikan solat Jumaat di Masjid Jamek Tangkak dan kemudiannya makan tengah hari bersama rakyat di Dataran Ledang, Tangkak.

Pada sebelah petang, beliau akan menemui pemimpin Umno dari Bahagian Gelang Patah dan Pontian dalam satu perjumpaan tertutup di Dewan Orang Ramai Gelang Patah, pada pukul 4 petang.

Perdana Menteri kemudian akan ke Johor Baharu untuk merasmikan Seminar Pembangunan Ummah.

-- BERNAMA

MNY PR